

## **Dadah: Lelaki mengamuk serang, ugut ibu**

April 6, 2016, Wednesday

Oleh Jeremy Lanson//

KUCHING: Angkara ketagih dadah, seorang lelaki tergamak menyerang dan mengugut akan membunuh ibunya yang enggan memberikannya wang dalam kejadian sekitar tengah hari kelmarin.

Insiden tersebut dilaporkan berlaku di Kampung Semariang Batu di sini, apabila suspek yang berusia 37 tahun terdahulu meminta wang RM50 daripada ibunya, disyaki untuk digunakannya membeli dadah.

Difahamkan, permintaannya itu tidak diperdulikan ibunya menyebabkan suspek yang merupakan seorang penganggur terus mengamuk.

“Ibunya yang berusia 57 tahun enggan memberikannya wang menyebabkan dia mengamuk dan cuba memukul ibunya menggunakan objek keras.

“Selain itu, suspek juga mengugut akan membunuh ibunya menyebabkan ibunya terpaksa menyelamatkan diri dengan bersembunyi di rumah saudara-mara,” kata sumber.

Menurut sumber, si ibu yang risau akan keselamatannya kemudian tampil membuat laporan polis berhubung kejadian.

“Insiden seumpama ini dikatakan bukan kali pertama berlaku menyebabkan ibunya yang risau akan keselamatan mereka sekeluarga nekad untuk melaporkannya kepada pihak polis,” kata sumber.

Bertindak atas laporan tersebut, sekumpulan anggota polis dari IPD Kuching berjaya menahan suspek yang bersembunyi di dalam biliknya sekitar jam 2 pagi semalam.

Sehingga berita ini ditulis semalam, suspek dikatakan masih ditahan untuk siasatan lanjut.